



اسم الكتاب : حلم البنات
اسم الكاتب : فؤاد البراهمي
رقم الإيداع : 2017 / 16823
التقييم الدولي : 9789778350067
الطبعة الأولى : 2017
إخراج وإخلى : هيام فهيم
صاور عن : مؤسسة زحمة للثقافة والنشر
15 ش السباق - مول الثريلاندر - مصر (الجريدة



www.za7ma-kotab.com



دار زحمة كتاب للنشر



za7ma-kotab@hotmail.com




01205100596

© جميع حقوق الطبع والنشر محفوظة

لمؤسسة زحمة للثقافة والنشر

المشهرة قانونا بسجل تجاري رقم /84486



مؤسسة زحمة كتاب للثقافة والنشر



إهداء

لكل شيء من اسمه نصيب
وقد أصاب المعز حين أسماك القاهرة
فقهرت كل من أراد بك السوء
وأخذت من اسمه فكنت عزيزة قادرة

تعودنا أن نهدي إلي الأشخاص، وذلك لما لهم من معزة في حياتنا وذكريات تجمعنا وحب. ولكني هنا سأختصر المشاعر التي في قلبي، والتي هي لكل من أحب من أهلي وأصدقائي، والأماكن، وأهدي هذا الديوان للجميلة القاهرة، أدام الله عزها وحفظ مصر من كل سوء.

✍ .. كواعب البراهمي





يمكن

يمكن مش جميلة

يمكن مش شعري طويل

يمكن مش لسه شابة

وكلامي في الهوي قليل

لكن عايش فيا قلب

لسه بيحب ويميل

يمكن مش بقدر أغني

ولا أقول أحلي كلام

يمكن مش بعرف ألون

ولا احكي في الغرام

لكن قلبي لسه يحلم

يملاً العالم سلام

وأنت جيتي في وقت ضايع

وكانك مسك الختام



جيت تقولي أني عايشه
ليكي روح عاوزة تحب
أنت فيك حاجه غريبة
فيك صدق وروح وقلب
فيك مبادئ لسه طاهرة
في زمن نفاق وكذب

فيك حاجات كتيرة حلوة
كل عمري مشفتهاش
فيك بساطه وصوت حنين
كأنه غنوة مسمعتهاش
صحي قلبي من مواته
وكأنه عمره ما عاش
واللي فات من عمري عدي
عمر ضاع مني بلاش



سيبك أنت

هي كده الأفكار بتشطح

وتأخذنا دايمًا بعيد

والسماء بتوهب وتمنح

ويتخلق فينا جديد

واللي كان مستحيل

والي فاكربنه صعب

يسهل بإرادة الحميد

قلت يمكن

مرة معاي الدنيا تصدق

وقلت يمكن

قلبي لسه يعيش ويعشق

وخذتني أفكار كبيرة

فكرة تسرق مني فكرة

قلت يمكن أبقى عندك

زي ما أنت برضو عندي



قلت يمكن بكرة أحلي

وعقلي بياخد وبدي

قلت جايز

أبقي ضحكة في عيونك

وأبقي من الكون ده كونك

وأبقي حرف في كلمة

بتكمل بيها حروفك

وأسكنك وأسكن في قلبك

وأتحدي حيرتك وخوفك

كل دي أفكار وجات لي

وأنا قاعدة لوحدي أسرح

قبل ما أعرف فين طريقك

وقبل ما عيني تشوفك

قلت يمكن ..



أنا العاشق

هذا الحب ارهقني

وأربكني وابكائي

وهذا القلب يؤلمني

وانا عاشق لحرمانني

كتبت الكلمه موجوعه

كتب الاله فوق السطر

علشان توصلك اهاتي

حاولت ابعد حاولت انسي

تعلقت بخيط الصبر

وحبك قاسي أضناني

غنيت أنا المواويل

رسمت عالقمر صورتك

بكي نهاري



انا مسروق

وسهران دمعي طول الليل

وانا اكتبك علي الكراس

واحكي غرامي لكل الناس

ولا راحم ولا حاسس

وانا العاشق

ولا قادر اكون معشوق

واكتب لك من قلبي غرام

معذبني مخليني كما المجدوب

وانا اللي عقلي ما قادر

يشيلك من تفكيره

وكأنك أنت ايامي

وكأنك انت روح روحي

وانا لك قلب متحير

وعاشق راضي بالمكتوب



وعايش ألام وعذاب
وأسهر ليلي و أفكر
ولا قادر قلبي يتوب
أمشي لك بلاد وبلاد
وأنا شاييل غرامي زاد
و بقلبي هموم ما تتقدر

أغني لك قلبي أشتاق
وأقول إن الهوي حراق
ويسمعني أهل الليل
ويسمعني نور الفجر
وأنبي بحكي لكل الناس
علي قصة هواي معاك
في الشوارع والدروب



وتترجاك لو ما كان ليا
في قلبك ميل . ما تنساني
أنا عايش ليك مأسور
وماشي جوه أحزاني

وأفكر كل ما يهل الليل
إن قلبي ليك مسكن
ومتقدر أنه يعيش مطرود
هايم في صحاري هواك
وتترجاك
تيجي طيف في أحلامي
وتبقى فرح أيامي
ولو بالقول
و حتى لو طيف في منام
أنا راضي بأوهامي ..



إلى الجنود

يا لي واقفين عالحدود
يا لي حاميين الوطن
يا لي فاتحين صدركم
ولا تخافوا المحن
يا لي عقدين العزم
يا لي شالين الكفن
يا لي بتصونوا الكرامة
من غير خوف او وهن
يحفظكم ربي القدير
ويحميكم طول الزمن..



على ضي القمر

مين ده اللي يقدر

يملكني أنا ؟

أوعي تفتكر إني

زي أي حد !

ولا عمري أبيع ود !

لكني في عز السكينة

بقدر أطير

وابعد كمان

أبعد كتير

أكثر مما تتخيل عينيك

وأبعد ما يحس قلبك

وأكثر من الكون ده كله



أوعي تتخيل

ان قلبي هو ملكك

أوعي تفكر عشان بحبك

يبقي خلاص ملكني قلبك

صحيح أنا جوه مني

طفلة هادية وطيبة

لكن مع أي جرح

أي كذب

أي تهويل في الكلام

تصحي ماردا عمره ما رضخ

ولا عرف إستسلام

يرفض يكون خاضع ذليل

يرفض حتى السلام



أوعي تفتكر علشان بحبك

ولا علشان أنت كل

حاجه في الحياة

تقدر تغير تمردي

ولا تحولني لأي إتجاه

أنت عارف

أنا زي الريح اللي ساير

وينفس قوته

مهما قابل من الصعاب

أنا زي الطير اللي هاجر

ورافض رغم شوقه ..

الرجوع

لأنه ما يحب العذاب

أنت عارف أنك عندي مش زي أي حد

و أنت عارف إنني من غيرك أتوه وأضيع

وأسأل وما ألقى رد



يمكن أكون محتاجه لك
يمكن أكون رغم بعدك
أنا برضو في بالك

لكن عمري ما أنحني
ولا أنادي قلب باعني
ولا قفل في وشي باب
أنا كده أتولدت متمردة
أهوي الصعاب

أنت عارف أنت بالنسبه لي أيه
يمكن في يوم تجيلي
وهتلاقيني
لكن مش هكون أنا
مش أنا اللي كانت
راسمة علي ضي القمر
لهفه وشوق وهنا



هتلاقيني واحده تانية متغيرة
باقي فيها من بقايا الحب شئ
باقي فيها دمعة
في عيون متحيرة ..



ناصر

يا شمس كنت منورة
ومالية كل الكون أغاني
غربت واحنا في نص النهار
وخلص مش هنشوفها تاني
كنت بسمع ضحكك
اجراس فرح
وانس كل هم
وكل ضيق وكل جرح
كنت وكنا وكان زمان
كله راح حتى الأمان
لسة صورتك علي الحيطان
و صوت دقتك علي البيان
كل حاجة لسه باقية
وكأنك ما مشيت
ولا فرق بينا الزمان ..



أجمل كلام

مادد أيده لإيديا
يقولي بلاش تعانديني
أتتي الأمل في حياتي
وأنتي ليا نور عيني
وأنتي الماضي وأنتي الحاضر
وأنتي دينتي وديني

تعالى نسرق الفرحة
تعالى نعيش لينا يوم
ومهما قسيت الدنيا
ومهما كان فيها هموم
بكرة الجاي ده لينا
قدرنا وحبنا المقسوم



رديت علي كلامه الحلو
ولقيت نظره عيونه بتعبير
عن كل سؤال في قلبي
وكل ما علي بالي يخطر
وقلت له أنا بحبك
قالي عارف وأنا أكثر

أنت الحنة في أيديا
ولونها الذهبي والأحمر
يا حبي الغالي يا عمري
يا ريحة المسك والعنبر
ولون الفرغ في أيامي
وطعم الحلوي والسكر
يا راسمه الفرحة بعيوني
يا قدرتي وطريقي الأخضر ..



حب عمري

يا حب عمري اللي ابتدا
يا صوت يناديني علي المدي
يا كلمة حلوة ونظرة حلوة
ويسمة واخداني للفضا
يا كل الماضي والحاضر
يا كلمة موجودة في خاطر
دخلت حياتي يا عمري
ويحبك ابتدا عمري
لأن العمر ده لحظه
فيها شوقنا بيسافر
ويرجع يعود
يعبر حدود
ويمحي كل سور
ويحطم كل القيود
اللي بتباعد ما بينا



وعشان كده أنا صابر
علي البعاد وبعافر
ومستتي يجمعنا يوم
ننسي فيه كل الهموم
وأكون علي مهرك
أنا قادر
ومن الآخر
روحنا واحده في جسدين
وهنعيش عمرنا عمرين
يا عمري ..



25 يناير

شفتي إن عيب علينا لما نسكت

وأنه عار ان غيرك يطمع فيكي

وان أولادك يا بلدي

مهما كانوا طيبين

ساعة ما بتنادي عليهم

بتلاقهم

يرفعوا راية الجهاد

عشان اسمك يبقى

أجمل اسم في البلاد

وان ربك هو حافظك

وان خوفنا عليك بس

هو اللي بيوصلنا للعناد

لان كل واحد فينا فاكر نفسه صح

لكن جنبنا ليكي هو أقوى حب



حتى الي قالوا عليه خان
وقالوا أنه باع القضية
هو أبناك هو من أرضك
هو بس كان مضحوك عليه
وكان فاهم إن ده هو الجهاد

طيب قولي ضد مين ؟
ضد أهلك ؟ ضد أبناك ؟

قومي أنهضني
وأكتبي علي تاريخك بالمداد
إنك هتبقني أغلي
وأجمل أسم في البلاد

قومي وقولي للناس
اللي فاكهه حقك
واللي بتغالط في روحها
قولي ليهم إن أرض السلام هي أرضك



وَأَنْ دَه مَش مِنْ كَلَامِي
دَه كَلَام رَبِّ الْعِزَّةِ فِي الْكِتَابِ
قَوْمِي - قَوْلِي لِيهِمْ
مَهْمَا يَحْصِلُ
إِنْ أَرْضَكَ مَش هَتَشْرَبْ دَمَ أَبْنِكَ
وَأَتْتِي يَا بَلَدِي يَا مَاتَ مِنْكَ وَوَلَادِ

مِنْ عَهْدِ أَحْمَسَ
لَا - مِنْ عَهْدِ أَخْنَاتُونِ
وَيُمْكِنُ قَبْلَهُمْ
لَكِنْ اسْمُكَ مَهْمَا يَحْصِلُ
عَمْرَهُ مَا يَبْقَى غَيْرَ اسْمٍ وَاحِدٍ
عَارِفُهُ لِيهِ ؟
لَأَنَّ رَبِّكَ هُوَ وَحْدَهُ أَرَادَ



لما ذكرك في كتابه

كل مرة بشكل أفضل

مرة إنك رمز الأمان

ومرة إنك رمز القوة

ومرة إنك الوحيدة

اللي تطعم أهل الدنيا من العباد

شفتي إزاي أنتي غالية

شفتي إزاي أنتي عالية

يا مصر يا جمل البلاد ..



17 فبراير 2015

مصر

يا معني العزة والكرامة يا بلدي
يا جيش خلاني رافع بيكي الراس
يا كل الحب والحنية يا وطني
يا كل قلوب مليانة دفا واحساس

تحية مني لكل نسر في جيشك
تحية كلها ود ورضا وإخلاص

دموعي من الفرح نزلت علي بابك
زي ما نامت يوم الحزن في ترابك
وأتوضيت وصليت علي أعتابك



حمدا وشكر .. فلك يا وطن حمي وحراس

وتحية لكل ولد شايلى همك على اكتافه

وللى يبزرع فى البلد بكل حماس

وفرحة فى قلبى حسيتها وحييتها

وشايلها لقائد قلبه زي الماس

انت فجر لأيامنا- عشان نصحي

ونبقى كلنا واحد -عشان بكره

وتتوحد و لو أختلف عليك الناس ..



زي الحلم

أنت زي الحلم بعيد

عالي مثل السما

انت نورك من القمر

ولا نور شمس مزهزه

علي غيط قمح انتشر

انت مين ولا انت ايه

انت مش زي البشر

انت مين في تصنيف الخلق

انت ضله ونور ونار

انت ابتلاء أنت قدر



أنا برسلك في خيالي دار
احن إليه وأنا في السفر
وأنت شوق الموج للشط
يهرب عليه من الضجر

أنت النعيم في عيون ولاد
في أجمل أيام العمر
أنت اللي وهيتي ضحكة عيون
و سعادة مليانه جنون
وافراح ممكن تلف الكون
ولا تتعب من السهر

انت مين وازاي وليه
جيت في حياتي لخبطتها
ولا انا اللي جريت عليك
وفتحت ايديا للهواء
وكنت فاكره انك حنون
طلعت قطعة من الصخر



انت مين يا قلب طيب
مهما يهرب ويبعد كثير
يرجع يحن لحبيب هواه
وكتب له آه
ومقدرش يقاوم حب السنين
فرماه في نار
ورمي كل شوقه
ونسي البعاد
وأمن إن الحب قدر ..



أم الشهيد

يا أم الشهيد أبنيك ما ماتش
لو تعلمي أيه الي أعده ربك للشهيد
لجعلتي من يوم إستشهاد أبنيك
في الأرض عيد
وكتبي أول واحده تفرح له بالشهادة
لأن حب الوطن والدفاع عنه عباده

يا أم الشهيد لا تحزني
ناس كثير بتموت لما يوافيها الأجل
لكن مش كل من مات
كان في موته بطل

أبنيك عاهد ربه
وصدق ووفي بالوعد
مش زي غيره
علي أرضنا أمريكا سجد



وجاي دلوقتي عاوز يفرق شملنا
ويقول أبنك رخيص علي أرضنا
أبنك حفر صورته وأ سمه في قلبنا

لا تحزني يا أم الشهيد

أبنك ما ماتش

أبنك عايش علي طول الزمن

فوق المحن

روحه ترفرف في العلا

وتطوف تسبح في جنة عدن

فأعظم شهادة

الموت في حب الوطن

وشاب يلاقي ربه

لابس علم بلده كفن

لا تحزني يا أم الشهيد

أبنك ما ماتش ..



حلم البنات

فاكره طبعا .. لسه فاكره
لما كنت تمسك أيديك بأيديا
لما كنت تخاف عليا
لما كنت بتناديني يا حبيبتى

فاكره طبعا - لسه فاكره
لكن العمر الي راح
عمره ما يرجع
والألّم الي شفّته لسه باقى
والعيون الي كانت بتضحك
بقيت دلوقتي بتدمع

أيوه فاكره
فاكره كنت تخاف عليا قد أيه
ولما كان الشوق بيبعد
كنت دايمًا بتناديه



كنا نسهر - كنا نحكي

كنا نتكلم كثير

عن حياتنا وعن شقانا

عن أملنا في هوانا

وعن قصة غرامنا

والحلم الي عاش معنا

فاكره طبعا لسه فاكره

كنت بتقول لي أن الحياة

من غيري متبعاش حياة

وأن الحب هيبقي بقلبك

لحد ما يبلغ عمرك منتهاه

كنت بتقول لي يا عمري

كنت بتقول لي يا قمري

كنت نور حياتك

لما حياتك كانت بسيطة

كنت بصدق كلامك



وأتاريني كنت عبيطة
كنت فاكره ان الحب
ممکن يعيش سنين
وأن اللحظة الحلوة
الي كانت بتجمعنا
هتبقى هيا هيا
لما تتلاقي الايدين

أتاريني كنت يومها صغيرة
والأمانى والامال
كانت طريقها قصيرة
وأتقابلنا بعد فترة
لكن راحت فين الضحكة
الي كانت منوره

فات عليها عمر وعدي
ودوب حتى السكات



كل دي قصة حكايا
دايما تحكيها البنات
وتفضل تعيش عليها
وعالقات من الذكريات

وتبقي فاكره
أن العمر لو رجع
هتختار الي علمها الكلام
والي عرفها معني الغرام
مش عارفه أنه هو هو
نفس الشخص بس مش قادر
يقول نفس الكلام
لان خلاص زي ما عمرها عدي
هو كمان عمره عدي وفات



هي دي القصة الحزينة

واللي مكتوبة علينا

يحكيها جيل لجيل

من البداية للممات ..



كتبت اسمك

كتبت أسمك علي صوتي
ويقوله حتي في سكوتي
كتبته وباما لسه اكتب
علي اللي جري لي وحصل لي

كتبت أنك حبيب روجي
ويلسم شافي لجروحي
وكان عمري ما بين إيديك
رميته ورحت يا عمري

أنت اللي قلبك حب الوف
و أنا قلبي اللي كان ملهوف
خلاص نسي اللي كان وراح
خلاص بطل يعاني الخوف



يا صوت يناديني من امبارح
يا هم في قلبي مش رايح
أقول أنا أيه واشكي بأيه
ده الظلم في كل مكان طارح ..



اتكلم

علي قد ما تقدر قول وأتكلم
عبر عن كل شيء ولا تسكت
عمر الدنيا ما تنصف ساكت
عمر الناس ما بتدي حقوق

طالب أنت بحقك وأسعي
رب الكون حاكم الملكوت
أسعي وأرضي بكل نصيبك
لا الظلم حياة ولا العدل الموت

أوعي تخاف من ظلم الناس
أوعي تكون فاقد الإحساس
قف علي أرضك بكل ثبات



رزقك مقسوم فوق السموات

عيش الدنيا بكل ما فيها

عيش أحزانها عيش أمانها

أفرح وأضحك حب الكون

أسعد لحظة هي جنون ..



حلم السفر

يا حلم كل العاشقين
ونبض الأشواق والأين
يا كل الحب يا بلدي
أبعد عنك أكون حزين

وتغوت سنين
ومهما أتغرب
وأبعد أعود
شاييل في قلبي كل الحنين

وشاييل همومي وضحكتي
أفرش علي الأرض التعب
وأقتل شوقي اللي أتغلب
وأضم أهلي بين أيديا
وأنسي كل الدنيا ديا



لما أسمع كلمتين
يا أبني يا حبيبي وحشتي
من أمي وأبوي وأخواتي
حتى الشوارع والجيران
والعماير والميدان
ليهم معايا ذكريات
باقية جميلة ومبهجة

ويعود زمان
عمره ما يرجع زي ما كان
لكن ريحته باقيه
وفي قلبي باقية بصمته
وعلى الطريق
والمفارق والحيطان



يعود زمان

تتمني أنه يعود حقيقي

لكن خلاص

خلص الكلام

واللي باقي الحب

يهمس في القلوب

وعلي الدروب

تسير ولادنا

بيحلموا بيوم السفر

ومهما نحكي لهم

عن الغربة

عندهم ليها ألف سبب

وألف طلب

وألف أحتياج

للبعد يمكن أو للعذاب أو للتجارب

ورسم بكرة وحلمهم

وكان الغربة حب ساكن في دمهم



وكأنهم عاشقين البعاد
وليهم مع الفراق غرام
ومن كل قلبي بقولهم
أسأل اللي أتغرب
وعاش الوحدة والغربة
بلدي هي أمي وأمهم
وسكتي وضحكتي

ويوم ما أتعب
هي برضة مخدتي
تسند راسي
اللي من الهموم تقل
وما لاقى حل
غير أني أغمض عنيا
علي صدر أمي وحبها



أمي الكبيرة والصغيرة
أمي الحقيقة والبلد
حلم كل العاشقين
ونبض الأشواق والأين
ومهما قلت مين يسمع ؟
وتقول لمين

ياللي عاشقين الإغتراب
ياللي بتحبوا البعاد
بلدكم أولي بحبكم
هي السفينة
في موج العذاب

ياللي عاشقين الإغتراب
أنا بس عاوزه أقولكم
خارج سور بلادي
الحب غاب .. الحب غاب



كنت فاكرة

أني طيبة ويغفر كثير
وأنسي وأسامح
كان متهيألي إن الألم
مهما كان قاسي وعنيد
وكان في القلب جارح
نظرة واحدة تشفيه
وترجع الحب اللي راح

وأكتشفت إنني مش كده
وصعب جدا أنسي الجراح
أنسي ظلم من يوم ما أبتدا
وصعب جدا علي قلبي
يكتم الأه والاللم
وينسي علي طول المدي



خلاص أنا اتعلمت القسوة منك

وأتعلمت أزاى أبيع

أتعلمت أشوف مصلحتي

وتكون مصلحتي فوق الجميع

كنت فاكرة انك بكلمة

تقدر ترجع لبي اللي فات

كنت فاكرة ان حبي ليك

عايش وموجود في الذكريات

لكن خلاص الحب مات ..



يسلم شبابك يا بلد

يسلم شبابك يا بلد
اللي علي ترابك سجد
واللي بنصرك وعد
يسلم شبابك اللي حلف
لا ينام ولا يحني الراس
يسلم كل أم وكل أب للشهيد

وكل طفل يبلم يعيش سعيد
وكل واحد كان أمله في الحياة
أن يربي ولاده ويشيل
من حياتهم كلمة آه

يا إيد مجرمة متعرفش ربنا
يا إيد قاسية ملطخة بدمنا
يا إيد كل هدفها هو هدمنا



ونسيتو أن مصر لكل مصري

هي أب وهي أم

هي حزن دافي يثيل الهم

هي الصدر الحنون هي الأمان

ومهما حصل ومهما كان

يسلم شبابك يا بلد

اللي علي خط الحدود

واللي بيضحى بحياته

لأجل يرسم بسمة فوق الحدود

لأجل ما كل طفل يعيش سعيد

ده كلام أكيد

مهما حصل ومهما كان

ومهما دار بينا الزمان

بيموت شهيد

ويتولد في كل يوم



عشرين وليد

يرفعوا راية البلد

يا شباب عظيم

اللي عايشين في الجبال

واللي قدروا علي المحال

واللي علي الظلم انتصر

واللي علي الإرهاب قدر

في وجه بحري وفي الصعيد

أتو الأمل

أتو أنشودة غزل

واتو الشمس ال بتنور

وتمحي الظلام

وتبنوا مصر اللي كانت

واللي مازالت

واللي هتعيش مليون ألف عام

واللي هتبقى عالية بيكم

من هنا ليوم القيام ..



تدور الدنيا

تدور الدنيا ونرجع تانى

لنفس البداية

نكدب روحنا ونفضل نحلم

أتارينا بنحلم نروح للنهاية

نقول خلاص قربنا نفرح

أتاري الجروح لها معانا قصة

ولها هدف وليها غاية

ونحلم بيوم

تططبب علينا

إيدين غير إيدينا

تعانق روحنا

فندمع عيننا

ونغني للغربة

مواويلنا الحزينة



يا شمس طالعة

قوية وعفوية

وشجرة حانية

بتضلل علينا

ونفضل نحلم ببكرة اللي جاي

ونستتي بكره وبكره وبعده

ونفضل نرجع لنفس البداية

لغنوة حزينة

ونجني في عيننا

موال العذاب

يا قلبي اللي داب ..



يا فرحتي

يا فرحتي
نفسى أحضنك
وأنسيكي كل الألم
وارسم علي وشك
ضحكة حلوة تتوره
وامسح من قاموس
حياتك كلمة ندم

نفسى اكتب لك كلام
مليان هيام
وشعور صادق
مخلوق معاي
سابق وجودي
سابق ميلادي
وكأنه من قبل العدم



واسمعك كل القصايد
اللي كتبتها في هواي
واقول كلام من قلبي كله
وأوصلك هوايا
وأوصلك شعوري
وتقول لي قول كمان
وسمعني حلو الكلام
قول واكتب يا قلم

وأسألك بتعشقينى
زي ما اتى بقلبي نور
تردي نعم

يا حب ساكن في الفؤاد
من قبل حتى الميلاد
يا نور عنيا وضحكى
يا أغلى عندي من الدنيا ديه
أنتى هواي وسكتى



واتتي الطريق
واتتي الصديق
واتتي الرفيق
لو ليلي طال علي المحال
أنتي قادرة
تزرعي في دربي نور
وتعدي معاي كل البحور
ولما نوصل آخر الطريق
تبقى أنتي جنتي
يا فرحتي ..



وعد

عليك أنا أخاف
وأخاف من يوم
يجي فيه و تنساني
وتنسي أني كنت في يوم
سبب للضحكة في عيونك
وبكرة لما تروح لبعيد
تنسي أني صورة
مرسومة علي جفونك

وأنت صاحبي أكون وياك
وأنت مغمض أنا جواك
رغم البعد فاكرني
وفاكر كل شئ بينا



فاكر الضحكة

والزفة والحنة

فاكر لما قلت لي يوم

هسافر بكرة وارجع لك

وجهزت أنا لك الشنطة

وأديك سافرت

ولما طالت الأيام

بعث لك جواب

بدمع عيوني خطيته

قلت يمكن يآثر فيه

ويرجع لي

ويقول لي عليا ما تهوني

وأنا استتي طلوع الفجر

من الشباك

عنيا علي الطريق

اللي أنا وانت مشينا فيه



وأقول أكيد فيوم يرجع

وأتاري القلب لما يفارق

بيتعلم القسوة

وحتى العين

تنسي إنها تدمع

وتأخذك مني الأيام

وأنا أستني

أعد النجم فوق راسي

وأشوف القمر وأقول

أكيد راجع ومش ناسي

كيف ينسي يوم إتقابلنا فيه

وطوقني بدراعه علي خصري

وحط ايده علي شعري

وقال لي أنت أحلي واحده في الدنيا

وقال لي كلام ما انيش فاكراه



لكن فاكرة إني بكيت من الفرحة

وقلت له يومها

أوعي تاخذك الغربة

وقال لي إزاي وأنت القلب جوايا

وأنت النبض جوه القلب

وأنتي الطعم للعيشة

وأنتي لدينتي السكر

وأنا هبعده يدوب يومين مش أكثر

وأكيد راجع

وأخذك لدينتي الحلوة

ونرسم حلمنا الأخضر

ومن يومها وأنا أستني

وأتاري الوعد أسهل منه مغيث

يموت الوعد لما القلب يتغير ..



اسأل نفسك

اسأل نفسك

قبل ما تسأل ليه أنا بعيد

أسأل نفسك ليه بتخون

قبل ما تعرف ليه أنا أنسي

راجع نفسك كام مليون

ليه بتضحى بقلب يريديك

باع علشانك كل الكون

كان مشتاقلك كان يبحبك

كان عارف أنك مجنون

كان بيعقول بكره هيعقل

بكره هيعرف مين أنا أكون

لكن شغنا الظلم بقربك

ودموعنا ما فارقت العيون

قلبي كان مشتاق للخير



كان مشتاق لقلب حنون
كان يحلم يعيش متهني
جيت جنبه جرب ظلمك
كان مدليك كل حنانه
وبعد ده كله عليك بيهون
هبعده بعد قد ما هقدر
هاترك عالم بيك مسكون ..



كنت بقول ..

كنت بقول لما اشوفك

أجري عليك واحضنك

وأغمض عنيا

وانسي الدنيا ولو ثواني

كنت بحلم بس أقولك

أنت الوحيد

وان أبدا مالكش تاني

ولما شفتك خفت أقرب

خفت من كل العيون

خفت أقرب لك

يقولوا عاشقة

ولا صابها مس

من الجنون



هم مش عارفين

إن الحب نعمة

وقسمة وحظ حلو وأمانى

هم مش حاسين

بيا فى بعادك

قد إيه بعانى ..



الحب إيه ..؟

عاوزة أقولك

حاجه حلوة

عارف عاوزه أقولك أيه

عاوزة أقولك أن الحب

مش كلمة تتقال في الهوا

ولا قلب يعشقتك

وتخاف عليه

الحب ده زي السحاب

لما ينزل منه المطر

الحب ده زي الطريق

لغريب راجع من السفر



ونبت يطلع من أرض الصخور
يعافر حتى لو كانت أرض بور
الحب هو السكن والمؤمن
هو الشمس تشرق بالدفأ
هو الوفا

في زمن قل فيه الصحاب
هو مكتوب لنا أحل قدر
الحب ده أكبر حتى من الكلام
أكبر من كل الحاجات
أكبر من لحظة شوق وهيام

الحب نعمه من السما
ورزق باعته لينا ربنا
الحب ده مصباح أمل
علشان ينور دربنا



أوعي تصدق أن الحب
كلمة من حرفين
ولا لحظة هيام في نظرة عين

الحب روح بتاجي روح
تلاقيها في الفضا المسموح
تهيم معاها في اليراح
وكانها روح مقسومة في روحين
وهو لما يجرحنا الزمن
هو البلسم ودوا المجروح ..



أجمل حب

يا أجمل حب في عمري
يا قلب أخضر
يا نعمة بعثها لي الرحمن
ما تتقدر

يا نور عيني ومواويلي
وضوء شمسي اللي بينور
يا فرح رسمته في خيالي
وطيف ما غاب عن بالي
يا طعم الحب في قلبي
وفي لساني
فكرني وأنا طفلة
بأول طعم للسكر



بحب الشعر في كلامك

بحب النظرة في هيامك

بحن أنا ليك وأنت بعيد

لبلدي واهلي

و بحن للونك الأسمر

بيننا كثير من المسافات

تباعدنا

بيننا كثير من القيود

تعاندنا

لكنك وصلت لقلبي يا قلبي

حييت أنا فيك الإصرار

أنا أمك وأنا دمك

وأنا في بعدك أشيل همك

أنا قلبك الصافي

ونبع حبك الدافي



ناديني تلاقيني

أنا أقرب إليك منك

ومن نفسك إلي نفسك

أنا الماضي بكل ما فيه

أنا أفراحه وجراحه

وأنا الحاضر

وأنت بسمتي لبكرة

وأنت عمري جاي مع الأخلص

أنت عندي أغلى الناس

خلص عشنا اليوم في يومين

وخلص بقينا سوي قلين

في حلم واحد وجسد واحد

مش جسدين

أنا وانت كتاب مفتوح

ولحن وغنوة

وأجمل كلمة بين شخصين ..



أجمل عيد

كل سنة وأنتي بسلام
يا كل الحب والوئام
مهما كبرت بحتاج لك
وبأنده لك ألاقكي
يجاونني كل شئ فيكي
وتاخديني في أحضانك
تقويني بإيمانك
وتدعي لي وربى يفتح
لي باب الرزق بدعاكي
ورغم البعد شيفاكي
كأنى ما بينى وبينك بعد
وأنا حافظة لك على العهد
لأمشي في طريق الخير مهما تعبت
ومهما شغت من آلام
ومهما قست الأيام ما تغيرت



يا .. أمي يا شمس أيامي
وفي عز الضلمة أتت فجر أحلامي
دعاكي ينور السكة
ويبعث لي ألف ضحكة
تنور طريقي قدامي
ولا نسيت ولا هنسي في يوم
دفا حضنك
وبدعي ربي يجمعني بيكي
طول العمر
ويحميكي وبديكي من الصحة
ومن الستر
ومن كل خير في الدنيا
لأجل تفرحي وتبقي أحلي الناس
يا ست الناس .. يا أمي



سفينة نوح

سفينة نوح نحتاج لك
تعدينا علي البر
تتجينا من اللي إحنا فيه
العالم اتملا بالشر
نحتاج لصحوة وضمير
الناس ما بقاش فيها خير
اللي بياخد مال الغير
واللي عايش لنفسه ويس
واللي عمره ما بغيره حس
واللي بيسرق مال الناس
واللي عاملين نفسهم
بتوع ربنا وللأدب حراس
وأغلبهم يظهر غير ما يبطن
وأكثرهم عايشين الحياة بالعكس



بعدها كثير عن روحنا

مشينا كثير علي الشوك

اللي يجرحنا

ومحتاجين نعدي لعالم غير

يكون أفضل يكون أرحب

يكون مليون بحب الخير

سفينة نوح نحتاج لك

نبعد بيكي عن الناس

اللي خدعونا

واللي أخذوا حقوقنا وخانونا

واللي في نفس جراحنا جرحونا

وبأرخص سعر باعوا

الذهب والألماس



سفينة نوح نحتاج لك

علشان نروح لناس

غير الناس

لناس تعرف ربنا

قلوبها مليانة دفا واحساس

لناس تعرف تصلي الغرض

وتعيش الحياة بالعرض

وعمرها ما ظلمت حد

وماليها الطيبة والإخلاص

سفينة نوح نحتاج لك

تودينا لعالم فيه ناس

غير الناس ..



الفهرس

| | |
|----|----------------|
| 1 | إهداء |
| 3 | يمكن |
| 7 | أنا العاشق |
| 11 | إلى الجنود |
| 12 | على ضي القمر |
| 17 | ناصر |
| 18 | أجمل كلام |
| 20 | حب عمري |
| 22 | 25 يناير |
| 26 | 17 فبراير 2015 |
| 28 | زي الحلم |
| 31 | أم الشهيد |
| 33 | حلم البنات |
| 38 | كتبت اسمك |
| 40 | اتكلم |



- 42 ----- حلم السفر
- 47 ----- كنت فاكرة
- 49 ----- يسلم شبابك يا بلد
- 52 ----- تدور الدنيا
- 54 ----- يا فرحتي
- 57 ----- وعد
- 61 ----- اسأل نفسك
- 63 ----- كنت بقول ..
- 65 ----- الحب إيه ..؟
- 68 ----- أجمل حب
- 71 ----- أجمل عيد
- 73 ----- سفينة نوح
- 76 ----- الفهرس





كواعب أحمد البراهمي - محامية بالنقض - وكاتبة من محافظة
قنا بصعيد مصر.

صدر لها :

ديوان أبجدية حب - وكتاب الأبواب المغلقة - وكتاب شرائع
محرمة الذي يناقش الأوضاع المجتمعية والعادات والتقاليد التي
تخالف الشرع والدين - وكتاب خلف الجدران عبارة عن مجموعة
قصص واقعية - وكتاب أنه ألد - وديوان شطر الحسن .
تشارك بكتابة المقالات الإجتماعية والسياسية في مجموعة من
الجرائد الألكترونية - وموقع صدي البلد الإللكتروني، والجرائد
الورقية عقيدتي - وأخبار قنا .